



*Iesus nourrit de cinq pains d'orge, & de deux poissons, cinq mille hommes sans les femmes & petits enfans.*

**L**ESVS s'en alla outre la mer Tiberiade, & grande multitude le suiuoit à cause des signes qu'il faisoit sur les malades ; ce que voyant Iesus, il dist à Philippes, D'où achepturons-nous des pains, afin que ceux-cy ayent à manger ? ( Or disoit-il cela pour l'éprouer : car il sçauoit bien ce qu'il feroit. ) Philippes luy répondit, Pour deux cens deniers de pain ne suffiroit pas à ce que chacun d'eux en prist tant soit peu. Et André luy dist, Il y a icy vn petit garçon qui a cinq pains d'orge, & deux poissons : mais qu'est-ce que cela pour tant de gens ? Iesus donc leur dist, Faites-les asseoir. Ce peuple donc s'assit environ cinq mille de compte fait. Et Iesus prist les pains, & ayant rendu graces, les distribua aux Disciples, & les Disciples à ceux qui estoient assis, & des poissons autant qu'ils en vouloient ; & apres qu'ils en furent rassasiez, il dist à ses Disciples : Amassez les pieces qui sont de reste, afin que rien ne soit perdu : ce qu'ils firent, & en emplirent douze corbeilles. Quand donc ce peuple eut veu ce miracle, il disoit, Cettuy-cy est veritablement le Prophete qui deuoit venir au monde.

*S. Matthieu Chap. 14. S. Marc Chap. 6. S. Luc Chap. 9. S. Iean Chap. 6.*